

Ich Prins Branko I sjtèl mich gear an uch veur.

Ruim 4 x 11 joar geleaje bin ich in de carnavalstièd in Gelean geboare en opgegreujd in Puth mit mien auwesj en zuske Marjon.

De middelbare sjoal hub ich gevolg in Gelean, woa ich un Sjènnès maedje Ilse lièrde kènne.

Doanoa bin ich rechte goan sjtudeere in Nijmege en aansjleetend begos es kandidaat-notaris in Gelean.

Inmiddels woon ich al 23 joar mit Ilse in de Geersjtroat in Bèngelder, zint veer getrouwd en hubbe veer twië leef zonen Kjell (15) en Mats (12). Aangezeen dat alle twië fanatieke zjummers zeen, bemuj ich mich auch geregeld mit ut reile en zeile van ut zjumwater en de watersjport in de regio.

De botterram verdeen ich es notaris in Beak bie Metis notarissen en Hogeschool Zuyd. Zo noe en dan bin in in ut boeteland om leazingen te geave of te euverlègge omdat ich mich gespecialiseerd hub in internationaal familierech.

In miene vrieje tied goan ich jekere zoaterdag sjporte bie Reuvers in Munstergelean. Mien anger sjport is skiën, wat ich jeker joar mit mien gezin en familie in Oostenriek doon. DIt joar goan ich waal get later om de ganze vasteloavend es prins euver Bèngelder te kinne regeere.

Doaneave reur ich mit reigelmoat mit unne groep mansluuj saame in de panne bie de Opsjuppers. Koakclup moagse ut eigenlijk neet numme, mer lekker eate doont veer zeker en ummer onger ut genot van veul gezelligheid.

De vastelaovend zit bie mich in ut blood. Op de 11 van de 11 begint veur mich de carnaval en heurse bie mich in de auto bienoa allein noch mer vastelaoves leedjes. Inmiddels bin ich auch al gans get joare mit veul plezeer lid van C.V. De Keescheknup. Ich ving ut geweldig dat ze mich dit joar es prins hubbe oetgekoaze en zal zeker mit trots in de Bèngelder vasteloavend veurop goan in de polonaise. Ich haup dat ich uch bie veul vastelaoves aktiviteite teage kom en dat ich saame mit de raad van 11, mien familie, vrung en mit uch unne onvergeatelijke vastelaovend moch viere.

Alaaf



Prins Branko I